

Minister Mike de Meza :

Esaki ta e team responsabel pa Aruba su refineria habri bek

ORANJESTAD – Minister di Asuntonan Economico, Energia y Comunicacion, Ing. Mike de Meza a gradici publicamente e miembronan di e delegacion cu den nomber di Gabinete Mike Eman a hiba e negociacionnan cu CITGO. Esaki ta e grupo di experto riba tereno di maneho, finanzas y ley cu a conduci na un acuerdo pa reapertura di e refineria na San Nicolas.

Pa lunanan largo cada un a traha duro y di un manera hopi dedica, consciente di e balor cu e acuerdo aki ta nifica pa e economia y futuro di nos isla.

Na prome luga, Minister de Meza a gradici Prome Minister di Aruba Mike Eman como lider pa e confianza deposita den su persona y e otro

miembronan di e delegacion, pa e sosten continuo na tur momento y pa pone como prioridad pa e reapertura di e refineria tin un aspecto 'green' cun'e na fabor di me-



dio ambiente. Siguiientemente e titular di energia pa Gobierno di Aru-

ba a gradici y felicita su colega den Gabinete Minister di Labor drs. Paul Croes, kende na varios ocasion a asisti e delegacion na Houston, Venezuela y Miami pa "negocia,

discuti y elabora riba e nivel di mas haltu den e companianan aki," Minister de Meza a

bisa y cu sigur "a haci un excelente trabou."

Minister de Meza a splica cu e team cu a negocia y a haci hopi trabou ta un team di nos mesun hendenan y esey ta haci'e ainda mas importante, aunke cu tabata tin sosten di algun experto internacional. Un ehempel sigur di nos expertonan Arubiano ta Sr. Alvin Koolman. "Tur hende conoce Alvin su capacidad, su conocimiento riba e tereno aki ta inmenso y e tabata un ayudo sumamente grandi," asina Minister de Meza a comenta, bisando tambe cu "su trabou no a caba, ta awo e trabou mes ta bay cuminsa." Abogado di Gobierno, mr. Johan Sjiem Fat tabatin na su encargo e trabou huridico cu ta conforma un gran parti di e negociacionnan. Minister de Meza a comparti cu "tabatin

momento cu mi mes tabata papia, discuti cu mr. Sjiem Fat y tabatin diferente bes cu e mester a duna mi un 'college' di ley pa mi por comprende e embergadura huridico cu esaki tabata abarca." Minister de Meza tambe a gradici hurista Douglas Bland di Houston cu a asisti mr. Sjiem Fat den e proceso.

Minister de Meza a gradici tambe Phillip de Souza, Glenn Geerman, Rene Leonora, Frank Hoevertsz y Jacobo 'Coby' Geerman pa e bon trabou desplega. Tur ta figura conoci den e industria petrolero local, regional, pero tambe internacionalmente. Coby Geerman ta un ingeniero kimico cu experiencia de area di plannan tanto na Lago, como na Valero. Su aporte tabata den tereno di economia y financia. □